

# ماکياتو

ماكياتو

شعر

وليد فوزي

تصميم الغلاف: محمد محسن

رقم الإيداع: 2020/ 2300

I.S.B.N:978- 977-6640-78-8

الطبعة الأولى 2020م



للنشر والتوزيع

الإدارة: 17 ش عزت باشا المطرية، القاهرة.

المدير العام: آيتة سعد الدين

مدير النشر: د. رامي عبد الباقي

هاتف: 01147633268 - 01099387500

E – mail:zeinpublish2017@gmail.com

Facebook: Zein Publish

جميع الحقوق محفوظة ©

**وليد فوزي**

# **ماكياتو**

**ديوان**





## إهداء

- إلى كل من يمتلك قلبا طيبا ليئنا في هذه الدنيا.
- إلى الحب الصادق الذي يمتلك قلوب العاشقين وأرواحهم وأحلامهم.
- إلى أبي رحمه الله مصدر الحنان في العائلة.
- إلى أمي صاحبة القلب الطيب والعطاء الذي لا ينقطع.
- إلى حبيبتي سوسو هدية الله لنا جميعاً في الدنيا.
- إلى أخوالي وخالاتي وأخوتي الذين تحملوا خفة دمي المفرطة لسنوات "كثيره أوي".
- إلى زوجتي وسندي وسبب سعادتني في هذه الدنيا.
- إلى أولادي أصحاب "القلشات" القاتلة وأصحاب الابتسامات الساحرة.
- إلى صديقي المخرج والروائي الجميل أحمد عويس.
- إلى كل الذين أحبهم ويحبونني.



## . ماكياتو

قاعـد بفكر فيكي  
وفي ايدي ماكياتو  
وقلبي من الأشواق  
واجعاني دقاته  
ينده بعلو الصوت  
وتئن نغماته  
حيرني أنا بصبره  
وحيرني بسكاته

فاسأل واقول إزاي  
سكنت ثناياته  
وإزاي يضحى عشانها  
بحياتي وحياته  
ولما اقوله خلاص  
مبقاش طريق نمشيه  
يحفر يجي ميت طريق  
ويزيدلى في عناده  
حالف يوصل لقلبك  
ومهزه في ثباته  
وتليي ليه النداء  
وتخشى جناته  
وتبقى ليه الدفا

والحضن في الدنيا  
وتبقى ليه السند  
لو يوم طريق فاته

قعدت أفكر تاني  
في قلبي ومتاهاته  
وأقوله ياما قلوب  
قبلك كثير ماتوا  
واقوله أيه الحل  
نبعد وننساها  
ولا تكمل طريقك  
ولو سنين فاتوا  
وقلت يلا اختار  
مستي إجاباته  
وشايفه وسط النار  
بضحكة مرسومة  
يقولي هي القدر  
ومقسومة لحياته  
وإزاي يدوم الكون  
من غير وجود القمر  
ولو ساعات يختفي  
نصبر على بعاده  
ما هو أصل الحياة  
وعشاقه فيه باتوا  
وسكنوا ضوء القمر

وسكنوا ظلماته  
لا حد منهم هجر  
مهما عليهم قسى  
واستسلموا للقدر  
وفي الطريق ماتوا

حتى لو أموت  
شهيديد..  
ما هي الشهادة شرف  
وكام حبيب فاتوا  
سكنوا جوه القلوب  
من بعد ما ماتوا  
فلو مجاش اليوم  
وهي ويايا  
مسيرها يوم هتقول  
وحشتني كلماته

## - المنارة القديمة

عند المنارة القديمة  
صخور تحكي لنا  
حكاوي اللي عشقوا  
وحبوا زمان  
وتوصف في حاله  
اللي عاشوا وماتوا  
وحب اللي فاتوا  
في نفس المكان

صخور محفور عليها  
بحبك يا هانيا  
وهاخطب سمييه  
ده أن الأوان

وصخرة بتحكي  
حكاية حبيبة  
اللي خانها حبييها  
ودمر حياتها  
ورد البيبان

وصخرة تداعب مشاعرك  
برسمة لقلب

وصورة كبيرة  
لبنوتة واقفة  
تفك الضفيرة  
رسمها حمادة لبنت الجيران

وصخرة بتهمس في ودنك  
ورافضة تقولك  
سر السعادة  
اللي كانت بتحضن  
محمد وغادة  
علشان هم حلفوا  
يخبوا اللي كان

وصخرة بتمسح بالموج كلامها  
وده لأجل خاطر واحد جدع  
رافض فضيحة  
حبيبته اللي خانت  
وحبه اللي هان

وصخرة بتنصح  
حيارى وسكارى  
يصونوا العذارى  
وداين تدان

وماشي بدور

علي صخرة فاضية  
اكتب عليها  
حيي اللي ليها  
وصل للجنان

لقيت.. قمت كاتب  
بحبك ودايب  
وحبك واجعني  
أوي من زمان

وعايز رضاكي  
وأكمل معاكي  
حياتي اللي جايه  
وأحس بأمان

عيونك بتديح  
وعقلي بيسرح  
في ضحكة شفايفك  
يا نبع الحنان

وصوتك له رنة  
وحضنك ده جنة  
وجهدي في سعادتك  
صبح لي امتهان

بحبك.. بحبك  
وعايش بحبك  
وميت في حيك  
ودايب كمان

## - عنيكى وحشاني

بقوم الصبح من نومي

بحس عنيكى وحشاني

غريبة!!

مع أن طول الليل

في أحلامي مأنساني

وأسمك على اللسان موال

بقوله بصوتي حياني

وليكي كل الكلام إتقال

وحضنك هو عنواني

وراحتي بشوفها في عنيكى

وعينك بردو سجاني

وقلبك لو هيبعد يوم

في كل مكان هيلقاني

ملامحك فيا مرسومة

ومقسومة علشاني

وقسما باللي سواني

لا هاستسلم في حبك يوم

واسيب اليأس يملاني

علي بابك كما الفرسان  
أضحى بعمري وزماني  
ومش ها قبل بعاذك يوم  
ده حي أنا ليكي خلاني  
أقوم الصبح من نومى  
أحس عنىكي وحشاني

## - لون عنيكى

لون عنيكى وضحكك  
شدوا قلبي لسكتك  
من غير إزاي وفين وليه  
أنا كلي داب في حضرتك

## - على تكت

وحشتني ضحكتها  
وحشتني رقتها  
تايه في سكتها  
نفسى أرسى يوم على بر

وقت الدلع قطة  
فرسمت ميت خطة  
ورحت على بيتها  
ويا الناقات الحمر

وصرخت من غلبي  
نفسى أخطفك جنبي  
وتمشي على دربي  
أسرتي قلبي الحر

دايب في معاليكي  
وبعمري شاريكى  
شبيكي لبيكي  
ده عنيكى تأمر أمر

حبك صبح ربكة  
خلاني على تكة  
حالف ما اسيب سكة  
توصل عنيني السمر

## صوتك

حاسس أني في دنيا تانية  
بس لما سمعت صوتك  
خليتني عشقت همسك  
حتى بعشق صوت سكوتك  
فاكره لما قولتي  
اممممممم  
خدتي قلبي لحتة تانية  
قلبي فيها كان في دنيا  
شمسي فيها نور عيونك

شدتيني من إيديا  
خلتيني في وسط كونك  
طير يرفرف وفي سماكي  
صوته شاقق ليل سكونك  
خلتيني أحب رسمك  
خلتيني أحب اسمك  
خلتيني جوه حلمك  
طيف ولونه زي لونك  
خلتيني ارفع راياتي  
واستسلم أدام عيونك

## عارفة القمر

عارفه القمر  
أنتي القمر  
عارفة النجوم  
أنتي النجوم  
وياكي بسهر كل يوم  
ومعاي يحلو السهر

واكل خيار.. خس وجزر  
ما هو أصل أنا عامل رجيم  
لأجل اللقاء المنتظر  
و تبقي جاية من بعيد  
فأجري بسرعة على الكاشير  
لو سمحت  
اتنين لاتييه  
بسكوت كثير  
طب في باتيه؟  
لأهات عسل وكمان فطير  
فألمح في عينك ابتسامه  
لأجلها قلبي انفطر  
وساعتها بس هتفهمي  
قلبي أنا في حبك فجر

تمشي بعيد وتودعيني  
فغصب عنك توجعيني  
وعنيا بتنادي عليكي  
هو أنتي أيه  
قلبك حجر

وأروح أشكي حالي للقمر  
وتأخذني دوامة السهر  
وأكل كمان خس وجزر  
ما هو لازم أمشي على الرجيم  
لأجل اللقاء المنتظر

## - حبك نار

حبك جنة  
حبك نار  
قلبي إترجل  
عقلي احتار  
خلي حياتي تخش متاهة  
توريطة معرفش مداها  
حاسس ندهتني النداهة  
وفي حبك ما املكش قرار  
حبك نار

حبك صيف وخريف وربيع  
حبك زعابيب  
حبك تين وخشاف وزبيب  
حبك خلى البال اتنى  
حبك خلى القلب يطيب  
حبك نعمة وحبك لعنة  
حبك ليه داء وطبيب  
أصلا حبك حلو حادق  
سخن وساقع  
وقلبي في حبك  
مايص مايع  
ما أنتي في قلبي أعز حبيب

حبك ده غريب

حبك ليه مزيكاً عجيبه

بوم بوم تك تك

بوم بوم بوم

كل قلوب الناس بتدق

كل قلوب الناس بتبوم

لكن قلبي لحبك حن

عكس النغمة وعكس اللحن

كل شوية يقول تن تن

كل شوية يزوم ويزن

حبك حطم كل حصوني

فتح الباب من غير ما یرن

وأنا سلمت لقلبك تاني

ما اهو أصل عيونك وحشاني

وأخذ بعضي.. ركبت حصاني

جايلك كده درجن درجن

حبك فعلاً حاجة تجن

قلبي ده قبلك كان فان دام

بعد ما حبك بقي بن تن

- مين غيري يقدر يسعدك!!!

مين غيري يقدر يسعدك؟  
ويسكنك وسط النجوم  
مين غيري خطط سكتك؟  
وشال على كتفه الهموم  
مين غيري يرسم بسمتك؟  
كده فوق شفايفك كل يوم  
من غيري نور دنيتك؟  
وزين سماكي بالرسوم  
من غيري يحمي خطوتك؟  
مين غيري حارب كل يوم

## - مبرتردش

صباح الخير.. مبرتردش؟  
تعدي حتى متبصش  
وامتي بس ما تصدش  
وساكت قلبي متكلمش

وبتسخنها صاحبها  
وهي عارفة علتها  
وبتزيد لأجلي قسوتها  
وليه تديلي بس الوش

لا أنا طالب تغنيلي  
وتيجي تسهري في ليالي  
وعايزك بس تقولي لي  
صباح الخير خلاص معلش

ما أنا أصلي دايب فيكي  
بموت من الضي في عنيني  
فلو جني تخليكي  
ده قلبي من الوجد بيكش

واخطط يجي 100 خطة  
أقابلك صدفة في محطة  
وقلي من الفراق شطة  
فأتوه واسكت ومتكلمش

وغيرتي عليكي ملعونة  
ما أصل عنيكي مجنونة  
الأقي الخلق مفتونة  
يفور دمي ومستحملش

وأراقبك رايحة أو جاية  
وعينك تيجي في عنية  
يجيلي سكتة قلبية  
أطب مكاني متقلبش

دخلتي حياتي بالقوة  
يا ساكنة القلب من جوه  
أنا قلبي ليكي بهوى  
وصرح بيها ميينكرش

وبكتب ليكي أشعاري  
و أبوح بمشاعري ولا دارى  
هاكمل ليكي مشواري  
وجايلك ناوي مستسلمش

## - علشان عنيكى الدوا

علشان عنيكى الدوا  
والقلب داب من الهوا  
شد رحاله ونوى  
يدق على بابك

لأجل العيون السمر  
ليكي يلي الأمر  
لو حتى طال العمر  
واقف كده ببابك

وعلشان عنيكى ملهمة  
فكتب لقلبك مظلمة  
توصف فى حالته المغرمة  
ما يمل بسؤالك

وعلشان عنيكى طريق  
وعلشان عنيكى صديق  
و بحر هواكى غريق  
رمى نفسه فى شباكك

جاي لك واخذ قرار  
لا يمل الانتظار

لو حتى يعيش في نار  
ساكن في محرابك

## - جايلك

لأجلك هعدي المستحيل  
لأجلك أخطي في وسط نار  
لوحتي سكة ألف ميل  
جايلك أنا بدون اختيار

## - صباح الخير على عيونك

صباح الخير على عيونك  
صباح الخير  
صباح الخير؟؟!!  
ما أنتي الخير  
وأنتي الضي في عيوني  
وأنتي في سمايا الطير  
وأنتي غنايا وشجونني  
وجودك في حياتي مصير  
يا منبع عشقي وجنونني  
ده سحرك خلى قلبي سكير  
جمالك حته من الجنة  
عيونك ده ما ليها نظير

خلاص ما نقول صباح تاني!!!  
صباح الفل على قلبك  
صباح الفل  
صباح الفل؟؟!!  
ما أنتي الفل  
يا نسمة تريح التعبان  
ونورك على العباد بيطل  
يا مياه تروي 100 عطشان

ونسمة في الربيع بتهل

ولا نافع نقول حتى صباح الفل  
خلاص ما نقول  
صباح الورد يا حياتي  
صباح الورد  
صباح الورد!!!  
ما أنتي الورد  
وفي عنيني هاأقول حكايات  
ده سحر عنيني ما لهوش حد  
وضحكة بلون شعاع الشمس  
بترسم نغزتين على الخد  
خلاص احترت في صباحك  
وعقلي من جمالك شت

بقولك أيه  
صباحي هو أنتي وبس  
يا فرحة قلبي وهنايا  
وبيكي القلب رق وحس  
وبحلف بالي جوايا  
بأن القلب ليكي وبس

## - صاحبت عرافة

ضربت كل الودع  
وصاحبت عرافة  
وقطفتلك ياسمين  
ومانجا وجوافة  
لأجل ما انول الرضا  
وأفتح بيبان قلبك  
يلا افتحيلي الباب  
ولا أنتي خوافة؟

لأجلك قرريت فنجاني  
في الليلة ميت مرة  
وفتحت ميت مندل  
مرة ورا مرة  
سقت عليكي الأوليا  
والجن والعفاريت  
لأجل ما اكون وياكي  
علي الحلوة والمرّة

## - رجل له ماضي

أنا رجل ولي ماضي  
واعترف  
ولولا الماضي  
ما صار حي مختلف  
ولولا الماضي  
ما اشتاق القلب رؤياكي  
فيرتجف  
وينجرف  
لحب تاه بهواكي  
ويكتشف  
بأنك أنتي معنى الحب  
وأن الحب مختلف

أنا رجل ولي ماضي  
وفي التاريخ تلقاني  
أمهد للهوا دربا  
وقلب الأنثى عنواني  
لا أدرك للهوا نارا  
وعصف الحب بكيانني  
ولا عيني تجافي النوم  
ويمسي ليلى سجاني  
وتحرق لوعة قلبي

فيمسي قلبي يتأوه  
وأيقنت  
بأن نساء الأرض واحدة  
وبفراشي  
نساء الأرض تتساوى

فجئتي أنتي سيدتي  
فها أفكاري تتهاوى  
غزوتي كل أوردتي  
وأمسي القلب يتداوى  
ويتأوه  
ويطلب رحمة منك  
لتغسل كل أحزاني  
أحبك أنت سيدتي  
ويبقى هواي عنواني

## - صرخ.. بحبك

صرخ وقالها

بحبك

من غير سبب ولا نيلة

ده سهام عنيني رممني

وأنا قلبي حيلته قليلة

وقعت أنا في شباكك

وخبطت على شباكك

هيمان في بحر الهوا

غرقان في بحر بليلة

وعجبي .....

## - الدنيا رحلت

الدنيا رحلة  
بوجودها تحلا  
من غير ما أفكر  
إزاي وليه

بصباح معطر  
وضحكة سكر  
وشعر سيلفر  
كده ديجراديه

قاعد بفكر  
من غير ما افكر  
وحيرتي تكبر  
طب أعمل أيه

رحت لأطبا  
إدوني حبه  
تخلي قلبي  
يرقص باليه

وقالولي فكرة  
أشم بودرة  
ويبقى أكلي  
شوربة وسوتيه

راح عقلي لخبط  
ولا عارف أخطط  
فقتت ضارب  
محشي وبانيه

## - ساعة تيجي وساعة تروح

ساعة تروح وساعة تيجي  
وساعة تيجي وساعة تروح  
وساعات حبيبي مني تروح  
وشوقي من الفراق يببوح  
أموت من حسرتي عليك  
وقلي من البعاد مدبوح  
وصورتك ضي في عنية  
دليل ليا منين ما بروح  
وساعة تيجي  
وساعة تروح

وساعات حبيبي بتجيني  
وترويلي عطش حبي  
و تجبر جرحي وأنيني  
و تملأ بالفرح قلبي  
عينها تبصلي وتنده  
وقلي للنندا يلبي  
يقول شببيكي لبيكي  
لعشقتك عمري ما هاخبي  
و حق السحر في عنيكي

تخليكي هنا جنبي  
ده أنتي العشق وأنتي الروح  
وجوه القلب خليكي  
وساعة تيجي  
وساعة تروح

## - أنا كافر

أنا كافر  
كفرت بشوقي لعيونك  
وليه حاير  
ما بين النبي وجفونك  
وليه حالف  
في قلبي تكوني ويصونك  
وليه خايف  
يضل طريقى ويخونك

أنا كافر؟  
وليه كافر؟  
بحارب شوقى وبعافر  
عشان ما اسكنش في سجونك  
وقلبي واخدني ومسافر  
عايز يتدفي في عيونك  
وبين ضحكة بصوت ساحر  
وبين شوق عالقلوب قادر  
وتاه قلبي وصبح حاير  
لقيتني صبحت مجنونك

أنا كافر عشان القرب مش عايز

صحيح جايز؟

ويمكن من الوجد خايف

ويمكن من حروب سابقة

صبح قلبي ضعيف تالف

وحريك أنتي محسومة

جنودك ضحكة وشفاف

فسلم كل شيء ليكي

وعشانك كل شيء خالف

## - تيجي أقولك

تيجي أقولك أيه ما بيننا  
تيجي أقولك على اللي صار  
ليه بقرب سنة سنة  
وليه بقربك عقلي طار  
ولوجودك قلبي غنى  
وماشي ادندن ليل نهار  
أنتي جيتي ليه جنة  
بعد مر الا انتظار

عارفة!!

في ما بيننا كيميا واضحة  
متنكريش  
والعينين لهواكي فاضحة  
حتى لو مقولتليش  
يكفي أنك بيا حاسة  
والقلوب لهوانا لامسة  
لو سألتني كل همسة  
راح تقول غيرك مفيش

طب خلاص.. غيرت رأيي  
مش هاقولك على اللي بيننا

مش هاقولك على اللي صار  
كل شيء جوايا واضح  
ليكي دايمًا في انتظار  
لما تتبسم شفايفك وتقولي  
اه.. بحبك  
اه.. ب..ح..ب..ك  
كلمة هتنور حياتي  
وبها تطفى ألف نار

## ـ منارة

أنتي للعشاق منارة  
أنتي قبلة للحيارى  
أنتي خمرة للسكارى  
أنتي أنس ولا روح

جاي ليكي اشكي همي  
واسألك جرحي تلمى  
مدي أيدك ليا وارمي  
جاي بحبي لأجل ابوح

أنتي بيتي والطريق  
الحبيبة والصديق  
انقذي قلبي الغريق  
قبل ما في حبك يروح

ناوي أكمل سكتك  
واغزو قلب حضرتك  
لو تزيدني في قسوتك  
أو تملي قلبي بالجروح

## - خلاص

أنتي فاكراه أني بعدت  
أنني هاستسلم خلاص  
فاكرة أني في يوم هابيع  
أقول مفيش نصيب خلاص

ياللي ساكنة جوه قلبي  
صدقيني مفيش خلاص  
أنتي جيتي ملكتي قلبي  
غيرك أنتي ما ليش خلاص  
وأي حاجة قبل منك  
قصة واتقفلت خلاص

أنتي حلم جميل وطال  
دوبت فيكي دوب خلاص  
حيي أقوى من خيالك  
والراية اترفعت خلاص

## - قلبي بيناديكي

قلبي تاني بيناديكي  
ويشكي حاله للقمير  
قلبي تاني بيناديكي  
ودق أبواب السهر  
ما أنتي عارفة إن قلبي  
حبك أنتي  
لحد ما في حبك فجر  
وعارفة إنني بغير عليكي  
علشان جمالك  
لم حواليني البشر  
وعلشانك أنتي  
تهت متي  
وتاه طريقي في السفر  
ولأجل عنيني وسحرها  
بنيت علشانك ألف سور  
يحموكي من شر الحسود المنتظر

صدقيني لما أقولك  
أن أنا بطلت أسكر من الخمور  
بس بسكر من عنيني  
لما أطول في النظر

فاكره لما بعدتي عنى  
كان ساعتها هان عليا  
إن يبقى ما ليش أثر  
صبحت حياتي ضلام  
وإزاي تنور  
لما غاب عنها القمر  
ما أنتي النجوم  
وأنتي القمر  
وأنتي الخلاص المنتظر  
عمري ما أنسى يوم ما جيتي  
وقلتي ليا  
هو أنا أستاهل ده كله  
ولا حبك ده قدر  
قلبي رد ساعتها قالك  
أن حنية عنكي  
خضرت قلبي الحجر

## ـ مستاهلش

منك أنتي مستاهلش

البعء عنى

حي ليكي مش بيأيدى

وده لأنى

لما شفتك قلبي دق

جوه منى

لما سلم بين أيديكى

غصب عنى

لما داب من نور عنىكى

وقام سألنى

هو أنا نايم ويحلم

ولا للأوهام بمنى

منك أنتي ما أستاهلش

فراق ولوعة

بعدي عنك ده قتلى

ما أنتي عارفة أنتي أيه بالنسبة ليا

عارفة أنك حتة منى

أنتي شمسي في وسط عتمة

أيد تطبطب وسط حزني

أنتي ليا ضحكة حلوة

أنتي قبلة

وفي حياتي أنتي غنوة  
لما أنا في حبك بغنى  
أنتي.. أنتي.. أنتي.. أنتي  
قلبي من حبك وجعني

عايز أقولك مش هاسلم  
حتى لو قلبك خذني  
حي ليكي راح يعلم  
كل عاشق جه سألني  
ليه تسلم بس ليها  
لما تقسى بس يا ابني  
يمكن اسرح ولا اتوه  
ولا حتى الصوت يخوني  
بس قلبي راح يقولها إنه حبك  
وحبك أنتي خلاص دبجني

## - أسطورة

لو أنتي حبيبي أسطورة  
هاجيلك فوق جناح تنين  
لو أنتي حبيبي عصفورة  
هازرع من المروج فدادين  
لو أنتي حبيبي مكسورة  
هاجر قلبك المسكين  
لكنك أنتي ما لكيش وصف  
بقيتي ليه حضن ودين  
وبحلف بالي جوايا  
وبني العينين الاتنين  
بأني عمري ما هاسيبك  
ولو حتى تروحي لفين  
مصمم قلبي يوصلك  
ولو عديتي سور الصين  
وها فتحلك ببيان قلبي  
وهستنى  
ولو حتى تمر سنين

## - أنتي مين

أنتي مين؟  
أنتي ليه؟  
ولا جنسك أيه يكون؟  
يمكن أنتي غزالة شاردة  
شوب سكر بالليمون  
ولا يمكن أنتي وردة  
ولا درب من الجنون  
يمكن أنتي زعيق ودوشة  
خدتي قلبي من السكون  
مش مهم  
أنتي أيه و ليه و مين  
المهم  
أنتي جيتي جوه قلبي  
وجبتي جووووون

## . حبك خطر

حبك خطر  
وأنا قلبي يبحب الخطر  
يا نجمة عالية في السما  
وسط الغيوم وسط المطر  
يا نسمة هادية في ليل ربيع  
بتهز أوراق الشجر  
يا كل حاجة وعكسها  
يا ملاك بريء وسط البشر  
حبك خطر

حبك حياة  
وطريق لقلبك برسمه  
واصل معاكي لمنتهاه  
إحساس جديد أنا بفهمه  
وكلام كثير وسط السكات  
بيني وبينك نعلمه  
أحلام تداوي جرح قلبي اللي انكسر  
ما أنا قلبي يبحب الخطر  
حبك خطر

حبك طريق  
لسه بخطي في أوله

حالف راح أوصل منتهاه  
مهما تعبت هاكمله  
حي هيسكن جوه قلبك  
راح يملكه ويزلزه  
راح يسأله بتحبي  
ويقوله آه  
أنت حبيبي المنتظر  
وأنا حي يتحدى الخطر  
ما هو قلبي بيحب الخطر

## - فرهوووودة -

لو أنتي لسه فرهوودة  
وأفكارك ده عالموضة  
ولابسة بوت وبرمودا  
ما تشغلنيش

تكيدي عشان أكون ليكي  
وشرك جوه ماليكي  
ومهما عملتي معاليكي  
ما تحكمنيش

ده قصة خلاص ومنسية  
وكنت أنا ليكي تسليه  
يا ماضي رميته بإيديا  
عشان أنا أعيش

ما تمشي وتهجري بابي  
ماهيش ناقصاكي يا عذابي  
سرقتي سنيني وشبابي  
مترجعيليش

يا قلب حزين بدون رحمة  
ده بعدك عني كان نعمة  
يا خاينة العشرة واللقمة  
متلزمينش

## - مركبة

قلبي في حبك مركبة  
ومشاعري فيها مكرربة  
رسيت في بحرك كلبشت  
صبحت حياتي مشقلبة

قلبي في حبك مركبة أكمها  
تفرد قلوبها للهوا ما تلمها  
ماشية بعجل وصلة لأخر سكتك  
حالفة لتحضن نور عنيكي.. تضمها

قلبي في حبك مركبة متأسسة  
درس علشانك التاريخ والهندسة  
حل جميع الأسئلة لأجل ينول محبتك  
وعلشانك أنتي هز طوله وراح كمان المدرسة

## - حبك لخبطة

ياللي أنتي حبك لخبطة  
ومشاعري ليكي مشطشة  
ما خلاص كفاية شحططة  
يلا افتحي كل البيان

أنا ليه عندك ميت طلب  
طمعان في حبك بالأدب  
زلزال هواكي جه وضرب  
غرقني في بحور الجنان

ياللي عنيني وسحرها  
سجنولي قلبي في أسرها  
مبقتش عارف سرها  
ونسيت أنا كل اللي كان

وشفايفك لما تبتسم  
النور في وشك يترسم  
والقلب ليكي بيتقسم  
سلمت ليكي أنا من زمان

جايلك أنا ورامي الحمول  
مستي قلبك يوم يقول

خلاص تعالي راح تنول  
الحب مني والأمان

وتقوليلي .....  
يلا اسكن جوه قلبي  
وأنتك أنتي قبلتي حيي  
تقضي كل العمر جنبي  
وتغمريني بالحنان

حتى لو على طول بعيدة  
ليكي هاكتب 100 قصيدة  
كل يوم كلمات جديدة  
ويمكن أكتبلك ديوان

## أنا العجري

أنا العجري قد جئت  
أفتش في ثناياكي  
بعقل بات ملتاعا  
وقلب ذاب بهواكي  
فهل ترضين سيدتي  
بشخص صار بهواكي

أنا العجري قد تبت  
أنا العجري قد ذبت  
وصرت بين كفيكي  
أليف مثلما القط  
فهل رحماكي سيدتي  
وللآلام تنسييني

أنا العجري قد ثرت  
وسلم قلبي راياته  
لعينيكي وشفتيكي  
وأسكنك ثناياته  
أنا العجري قد مت  
كووس الحزن تسقييني  
فجودي علي سيدتي  
فقط حبك سيحييني

## - قولِي أَي

مش هاسيبك  
إلا لما تقولي أَي  
تعلي حبك لقلبي  
للي رايح واللي جاي  
تيجي وتدوبي في هوايا  
ترسمي حلمك معايا  
والغرام بيان عليكي  
للي ميت واللي حي

## . صباح الخير

قلت لحبيبي صباح الخير  
ردت عليا صباح النور  
العينين جت في العينين  
خلت الأشواق تفور  
قمت خدت نفس عميق  
لأجل خو في يروح.. يغور

قلتها ويكل جرأة  
مش هاحور  
مش هالف ومش هادور  
أنا بحبك  
أنا بحبك  
أنا.. بحبك  
وعقلي انهيار  
وداق سحرك  
غرقت أوام كده في بحرك  
وأنا قبلك معدي بحور

عنيكي نورت قلبي  
وقربك مني شمس ونور  
ونفسي ابقي وياكي

وأكمل رحلتي معاكي  
وقلبي يطيب لرؤياكي  
ولو زمني عليا يجور

أنا جايلك وأنا مصمم  
وهافضل أقول وهاتكلم  
ده لأجل عنيكى تستسلم  
وتعلن حبها المغرور

أنا واقف كده ببابك  
ومش ماشي  
وأيه يجرى  
لو أبقى صفحة في كتابك  
ميجراشي  
ده حبك سيف على قلبي  
وحكمه على الفؤاد ماشي  
ولو حتى جرح قلبي  
و سابيني في الألم مكسور  
لا هاستسلم في حبك يوم  
يا أجمل من بنات الحور

## - وإيه يخليني استسلم؟

وإيه يخليني استسلم  
وأشق طريقي من غيرك  
وأيه يخليني أتألم  
واطاوعك رغم تحذيرك  
بأني نصك الثاني  
وهاشغل كل تفكيرك  
لحبك عمري ما هاسلم  
هاعيش راهب كده في ديرك

وأيه يخليني أهد الحلم بإيديا  
وأسيب جنة بعيش فيها  
وماليا الدنيا ده عليا  
ده أنتي قبلتي وداري  
وأنتي الضي في عنية  
وحضنك بس يحييني  
ويجبر من الجروح مية  
اه لو حبك يداويني  
وبرموشك تدفيني  
يا حلم العمر وسنيني  
نصبي وانكتب ليه

وأيه يخليني أني أقبل بقولة لأ  
وأسيب حيي يضيع مني  
بعد ما قلبي حب ودق  
ولازم أصبر إكمني  
طريقك جوه قلبي اتشق  
هاشيلك جوه في النبي  
ده بعدك عني جنني  
وحبك شيء يطمني  
ده حبك ليا عدل وحق



## - في وصف الشفايف

إحم.. إحم  
صباح الخير  
النهاردة كلامي كله  
هيبقي في وصف الشفايف  
عقلي نار وقال يا ابني  
الشفايف مرة واحدة  
الشفايف!?!  
يعني مش هايب وخايف  
يعني لما عليك هتقلب  
هي حرة  
والعتاب يزيد يا حلو  
وتبقى بره  
يا ابني ما تبطل مخاطرة  
ولا أقولك..  
اعمل زي ما أنت شايف

رد قلبي وقام وقاله  
جرى أيه يا عم عقله  
إهدى خلاص  
بشويش عليه  
ابننا وحب واحدة  
ليه يخبي حبه ليه

إنه يعشق كل حاجة  
فحما.. هو بأيده أيه  
سيبه يوصف في العينين  
ولا في لمس الأيدي  
سيبه يوصف في الشفايف  
أنت دخلك بس أيه

بص عقلي ناحيته وبكل حدة  
قاله أيه جرى أيه يا بيه  
بس متجيش تشتكي  
من الفراق  
والجروح جواك بتدبح  
من مرار الاشتياق  
شكله بينكم في اتفاق  
قولي فيكم أعمل أيه

الصراحة..

قمت ساحب نفسي خالص من المناقشة  
الحقيقة.. كنت خايف  
أعمل أيه يا ناس قولولي  
أصلي دبت في الشفايف

## - مجذوب

لا أنا ممسوس ولا مجذوب  
أنا عاشق  
وحبك ليا كان مكتوب  
أنا سايق  
عليكي القسمة والمكتوب  
أنا هافتح بيان قلبك  
ومش هارضى أني أبات مغلوب  
لا هاستسلم كده في حبك  
ولو على الحرب أكون مغصوب

هاقف صامد قبال ربحك  
ولو ربحك تهب هبوب  
وأصمم أني أوصلك  
ولو حتى هاكون مصلوب  
وبأيديكي وعلي بابك  
هاكون لك كلمة في كتابك  
وعن حبك لا يمكن أتوب  
هاكون لك عمري كما عنتر  
ومش هارضي أني أكون شيبوب

## . أوهام

كل اللي فات ليا جَرَح  
والحب كان أوهام  
أول ما زهرك طرح  
بعتي لييه؟  
وبكام؟

أنا كنت ليكي الدوا  
وأخاف عليك من الهوا  
قوم لما صابني الهوى  
بقيت من الخدام  
بالذمة ده اسمه كلام

أزرع دروبك محبة  
تسقي دروبي ضلام  
أديكي من عشقي حبة  
تديني شوك وآلام

لأجلك صاحبت القمر  
وعشقت طعم السهر  
ولما قلبك أمر  
لبيت نداكي أوام  
قوم لما زهرك طرح

## ترميني للأيام

قصة وخلصت خلاص  
فيلم من الأفلام  
شارع طريقنا افترق  
راجع لليلي أنا  
و أوعاكي تنسي في يوم  
أنا كنت ليكي إمام  
كنت في حياتك دين  
وركعتي للأصنام

## - مقام

عشقي الي جاي ليكي  
وبعمري أفديكي  
ولأجل ما أرضيكي  
بنيت في قلبي مقام

فأروح أقيد شمعة  
وفي العينين دمعة  
وفي قلبي نار والعة  
وبمثل أني تمام

وأناديكي ياطاهرة  
أرضى بقى في مرة  
عيشتي بقت مرة  
وتعبت من الأوهام

وكتبتلك أشعار  
ليلاتي بالأسحار  
والعقل بات محتار  
عايز يعيش في سلام

قاعده هناك درویش  
ادام مقامك أعیش  
حالف خلاص ما أمشیش  
مهما تفوت أيام

وبقیته خلاص مجذوب  
على أمری أنا مغلوب  
مش راضی بالمکتوب  
ومالیش غیر الأحلام

## - اللي حصل كالتالي

الي حصل كالتالي  
زارت أحلامي ليالي  
قلبي وسرقت  
حي وخطفت  
شغلت قلبي الخالي

رمتيني في وسط النار  
والعقل خلاص احترار  
أنا جايلك وبإصرار  
مخطرش في يوم على بالي

لوجودك شنة ورنه  
والقلب في حضنك غنى  
ما هو أنتي النار والجنة  
وأجمل كلمة في موالي

طب أعمل أيه في عنيكي  
لما شدتني أنا ليكي  
قام كلي مسلم ليكي  
وعذابك بقي يحلالي

وباقولها بكل وضوح  
ما أنا ليكي كتاب مفتوح  
اسألي قلبي المجروح  
هيقولك على اللي جرائي

## - غريق

علشان عنيني الدوا  
علشان عنيني طريق  
القلب داب من الهوا  
وأنتي هواي حريق  
سلم قلاعه وهوى  
شد رحاله ونوى  
يغرق في بحر هواي  
لو حتى بحر غريق

## - عيد الحب الحزين

أجلس على شاطئ الأحزان وحدي  
في عيد هو للعشاق  
أراقب الضحكات  
أراقب الهمسات  
أراقب اللمسات  
وقلبي يشكو من لوعة الفراق

أجلس على شاطئ بلاضي  
اتجرع مرارة الفراق  
ككؤوس من الفودكا  
في الليالي الباردة  
واشرب واشرب  
حتى أغيب عن الوعي  
فتأتيني في حلمي  
كحضن دافئ  
فتجبر قلبي  
ويتحول من قلب ميت  
إلى قلب حي  
وتهمس في أذني أنه الفراق  
إنه الفراق  
ما عدت أحبك  
ما عدت شمسا لك

ما عدت سندا لك  
ما عدت نورا لك  
ما عدت رفيقة لك في الحى

أصحو من حلمى  
عندما يلطمني البحر بأواجه  
و مياحه المليئة بالملح والمرار  
أسمع صوتها من بعيد وهي تنادى  
هذا ليس باختيار  
هذا قرار  
تغدو مبتعدة عني  
وهي حتى لم تمنحني اختيار  
اختيار حياتي  
اختيار موتى  
أو حتى اختيار الانتحار

لا أملك إلا أن انتزع قلبي  
وألقي به في أعماق البحر المظلم  
فأنه ملك لها  
ولم يكن لي في هذا الأمر خيار  
فانظر للعشاق نظرة أخيرة  
وأقول في قرارة نفسي  
لقد كان حبنا مطرا  
نسقي منه السهول  
حتى تصير جنة

وتفويض به الأنهار  
لقد كان حيننا شمسا  
وقبله ورمزا  
فيأخذ بيد العاشقين  
من ظلام الليل  
إلي وضح النهار  
أفبعد كل هذا تخبريني  
بأن هذا الصرح قد انهار  
من أجل أسباب واهية  
وحق عينك التي هي قبلي  
ما لك اليوم من أعذار

وأعود إلى واقعي  
وأنا أودع عالمي  
وأنا موقن بأن الحل  
لا يكمن في موت قلبي فقط  
فاخترت الانتحار

## - بيتسم

عائش وشايل فوق كتافه جبال  
لكنه واقف بيتسم  
يرسمه بسمه فوق وشوش الناس  
وراضي بالي بيتقسم

## - موناليزا

لا أنا عايزك موناليزا  
ولا فرفوشة ولذيذة  
ولا اسمك سوزي أو ليزا  
ولا شقرا بشعر أصفر

ولا وارثه فلوس وحاجات  
ليلاتي كل يوم خروجات  
وحاطه عالعينين عدسات  
بلون أزرق ولون أخضر

ولا عايزك كغصن البان  
بيتمايل في كل مكان  
ولا عودك كما الغزلان  
وهي ماشية تتمنظر

ولا عايز هدوم سينييه  
وشنطة تعدي ألف جنيه  
ونظاره وبوت فيرنيه  
وبرفان أصلي بيعطر

عايز قلبك يكون طيب  
ودايما مني أنا قريب

ويجبر قلبي ويطيب  
لو الدنيا في يوم تغدر

وعايزك سندي في الدنيا  
وتسقي القلب حنية  
تكوني الفرحة في عنيا  
وحبك على الصعاب يقدر

وأكمل دنيتي معاكي  
وراحتي تبقي وياكي  
تداوي القلب بهواكي  
بحب كبير ما يتأثر

## - خمس أيام

قلبي وجعني خمس أيام  
عقلي احتار مش عارف أنا  
لما البت حبيبتني سابتني  
وسرقت من عمري الأحلام  
سرقت فرحة قلبي أنا مني  
وزرعت من الأحزان الغمام

أول يوم  
مجايفيني النوم  
بحلم بيها  
وكل ما فيها  
محفور في خيالي ومرسوم  
وابتسامتها  
وسحر عينها  
بتزود وجعي المكتوم  
عايش طول اليوم بناديهها  
ساكت كده على طول مهموم

لما دخلت في يومي الثاني  
كان نفسي يكون قلبي أناني  
ينسى وجودها يوم في حياتي  
يمسحلي دموعي وأحزاني

لكن قلبي  
ساق في عناده  
زاد في بعاده  
سلمني أنا لهما ورماني

تالت يوم  
ضحكتها بتزلزل قلبي  
ضحكة تكسر كل حصوني  
وبتفضح أشواقي وحي  
وعينها في النار يرموني  
حتى لما الناس يلوموني  
عمري ما أداري وجودها في قلبي  
سرقتم عمري  
خانت حي

رابع يوم أنا بنهار  
أمي شافتني قالت يا نهار  
ابني يا ناس كده هيضيع مني  
غدرت بيه بنت الكفار  
وقعدت ترقيني وتدعيلي  
وقريتلي حتى الأذكار  
قامت عملت لحمة وشوربة  
وعملتلي كفتة وممبار  
حب بجد.. حب حقيقي  
خلاني قاعد محتار

خلاني أعيد الأفكار

خامس يوم  
قررت أخرج بره البيت  
عادي قلت أغبر جو  
كان نفسي في رز وسبيط  
كان نفسي الأيام تحلو  
كان نفسي أضحك من قلبي  
وأقول للأحزان هاأو

عدي يدوب  
كده يوم ورا يوم  
شغلتنى بنت اسمها منة  
مرسومة وعينها بتديح  
ضحكتها حنة من الجنة  
يوم وإثنين وتلاتة معاها  
غدرت بيا رمتني في نار  
قمت مروح جري علي أمي  
متنكد بصرخ متهار  
ممکن يا أما تجيبي دواكى  
حضنك مع كفتة وممبار

## - بحبك

بحبك قد موج البحر  
بحبك حب أسطوري  
بحب في نور عنيني السحر  
بحبك كلمة في سطوري  
بحبك صوت يشق الصخر  
بحبك في الظلام نوري  
ماليش في هواي غير الصبر  
يا أجمل نسمة في بحوري

## - بيننا حساب

حبيبي

ده إحنا بيننا حساب

وبيننا سكة مرسومة

وهافتح بيننا مليون باب

ده روحنا لبعض مقسومة

بدون تفسير

بدون أسباب

لروح هامت كده في حبك

و قلب في نور عيونك داب

حبيبي

لسه بيننا حساب

بنظرة واحدة من عينك

أسرتيني

ولمسة دافية من أيدك

ملككتيني

وحضنك جنة مرسومة

تداوي جروحي وأنيني

أسرتيني

أخذتيني

لدنيا

أنتي كل شيء فيها

بقبتي الأهل والأصحاب  
حببتي  
لسه بيننا حساب

حببتي  
لمستك جنة  
ونفسك همستك رنة  
ترن في قلبي من جوه  
تلاقي القلب قام غنا  
وتبقي أنتي مواله  
وتبقي لدنيتته معني  
وتصبح راحة بعد عذاب  
حببتي  
لسه بيننا حساب

حببتي  
كوني هنا جنبي  
وخليكي  
ونغرق في بحور الحب  
واعيش ليكي  
واعيش بيكي  
تدقي القلب من جوه  
يفتح كل شبابيكي  
لنور يبطل من عينك  
يفتح ليكي مليون باب

حييتي  
لسه بيننا حساب

## ينفع كده!!

ينفع كده  
ينفع عنيني بسحرها  
تذل قلبي لحضرتك  
تكويه كده بنار الهوا  
يصبح أسير لمحبتك  
ونهار وليل من لوعته  
يشكي همومه لده وده  
بالذمة طب ينفع كده

## . قلب ومتشعلق

أنا قلبي متشعلق  
في حبال هواكي يا ذوق  
وعقلي متعلق  
مسطول ما راضي يفوق  
عنيكي ده غارة  
مرسومة بشطارة  
لولا بسة نظارة  
أو جوه ميت صندوق  
سهام عنيكي رمت  
ولنار هواكي بدوق

## - قلبي نط نط

قلبك ليه أناني  
ليه يببط قلبي ببط  
سهمك ده رماني  
خلي قلبي يفط فط  
وقلي لما حبك  
حطك أنتي في حطة حط  
ولما شاف عنيني  
قام رقص ونط نط

حلمه بين أيديكي  
ليه تخليه يشت شت  
وخوفه كتير عليكي  
وبطل أنه يعط عط  
اسمك ده في خياله  
قبل ما حتى يخط خط  
لو ضرر يمسك  
عنك أنتي يصد صد

طب ببقى ليه تصدى  
وعن هواه تغضي غض  
طب لو عليه تردى

ده الوجد بيعضه عض  
بنظرة من عنيني  
روحه ترد تاني رد  
نفسه يكون معاكي  
في السما أو أرض أرض  
وتكوني في حياتي  
مش سنة لأفرض فرض

## - الحلو بزيادة

الحلو بزيادة  
تقله فوق العادة  
لأكله إلا ده  
قلبي وجعني بجد

عيونها ده بتحرق  
وفي ضحكتين تغرق  
وللقلوب تسرق  
ده جمالها فوق الحد

بقول لمعاليكي  
الحل أيه فيكي  
مفيش غير أهديكي  
مية بوسة فوق الخد

قلبي رفع رايته  
سلم ومن حيرته  
والعقل تاه برضو  
ولنور عنيكي اتشد

وبتوه في دوامة  
وقلت أه.. ياما  
وبضحكة بسامة  
أنا روجي ليه ترد

يا ضحكة مرسومة  
بالحسن موسومة  
ولقلبي مقسومة  
لأفرش طريقك ورد

يا كلمة في كتابي  
وطوفان كسر بابي  
يا كل أحبابي  
حالف لأصون العهد

طب ما تقوليش لأ  
وتزيدي في الفرقة  
أنا أصلي على زقة  
ويزيد جناني بجد

## - أرقص التنين

حبيبي يلا باركلي  
أنا أصلي اشتريت تنين  
محوش تمنه من مدة  
فلوسه جايه بالضالين  
يدوبك.. مستلم رخصة  
فجيتلك فجر يوم الإتنين  
عشان ناخذ الطريق بدري  
وما يكونش في طريقنا كمين

معلق فواحاحات غالية  
بريحة المسك والياسمين  
وجايب فينو بالجبنة  
وكام بيضة  
مع شوية عصير مانجا  
وحبة تين

هلف الدنيا ده معاكي  
فنوصل عند سور الصين  
وفوق السور هنتمشى  
ويمكن حتى نتعشى  
ونسج من النجوم ممشى  
في وسطهم عودين ياسمين

اتغزل كده في عودك  
فاسمع ضحككتين حلوين  
فالف أيديا حوالبيكي  
وأحاوطك بالأيدين الاتنين  
وعلشان نبقي وحيننا  
فقمتم مسرب التنين

بقرب منها واستهبل  
وبعمل أني باخذ تين  
فابلع ريقى وأتجرأ  
وأسيب ميت بوسة على الخدين  
وسقف طموحي ده بيعلي  
ومش عارف واخذني لفين  
لمحت عنها بتقولي  
هتتشاقي يا نور العين؟؟  
وماله.. طب ما تتشاقي  
وضحكت بالعنين الإتين  
فخلت قلبي يتنطط  
وقمت أرقص التنين

## - رمضان كريم

هل الهلال  
والناس خلاص هتصوم  
ولسه قلبك حجر  
إمتي تحني في يوم  
وأصعب على قلبك  
فألاقيكي قدامي  
تليي أحلامي  
وتصدري مرسوم  
بأني وحدي أنا  
مالك هوا قلبك  
وأنتي في حياتي قدر  
كان من زمان مقسوم

اعتبري حبك زكاة  
تجوز على المحروم  
وأنا المحروم في حبك  
ومن زمان مهموم  
والدنيا ده في بعدك  
عتمة ما ليها لزوم  
ما هو أنتي ليا القمر  
وأنتي في سمايا نجوم  
علي طول في أحلامي

أولما بصحى وأقوم  
صورتك قصاد عيني  
ومعايا طول اليوم

طب ليه تزيدي الجفا  
وتزيدي ليا اللوم  
وتقوي على قلبي  
وليلاتي أبات مهزوم  
وقلبي يشكيلي  
بصوت حزين مكتوم  
مستني يوم قلبك  
ينصر هواه المظلوم

## - متصدقيش

متصدقيش كل كلمة  
قالوها عنى  
ومتحكّميش غير بقلبك  
رغم أنى  
قاصد أشوه صورتى  
يمكن تكرهينى  
وأقفل ببيان مفتوحة  
لكن غصب عنى

أيوه عايزك تكرهينى  
وتسيينى  
وتحلفى أنك بعدتى  
ونسيتينى  
حتى لو يوم اتقابلنا  
والكلام تاه عن لسانك  
لما عينك جت فى عينى

أوعى تنسى أنى خاين  
وابعدينى  
وبخينى  
و بكلام مسموم بيدبح  
اقتلينى

مهـما أقولك ارحمـينـي  
زيدـي تاني في القساوـة  
وفي بحور الحزن تاني  
غرقـينـي

أصل قريبي منك أنتي  
نار بتحرق.. صدقيني  
بردو بعدك نار بتحرق.. كل ليلة  
ما أنت أصلك سكة ليا  
بس سكة كانت طويلة  
ما اعترضتش  
حالف أني أمشي فيها  
مهـما كان الريح شديدة.. أو خطيرة  
كنت فاكر أنه يوم  
سهل أنولك.. وتنولينـي  
ما أنتي عارفة كل حاجة  
أنتي لسه هتعرفيني؟؟!!

كنت بحلم كل ليلة  
كل لحظة  
كل ثانية  
أنـي جايلك فوق حصاني  
أخطفك وتخطفينـي  
وأهدـي ليكي ألف نجمة.. وتهادينـي  
ضحكة حلوة من شفايفك

تبرق الأنوار في عيني

صدقيني

أنتي بس اللي في حياتي

ولماتي

أنتي أيد تجبر أنيني.

أنتي عارفة؟

لما أمثل أني خاين

وبعيونك تكسريني

وتلوميني

وتقسي على قلبي وسنيني

ببقي نفسي أني أضعف

أنني أطلب البراءة

أنني أملك الجراءة

واعترف.. حبك مالييني

أنني عمري يوم ما خنتك

أنني صونتك

بس بسكت

خايف أنتي تصدقيني

أيوه ببعد

وياما قلت كتير.. نصحتك

الحروب اللي إحنا فيها

لأجل ما أخذك قلعتي ونعيش سوا

مش لصالحك.. مش لراحتك  
ورغم أني صحيح عشقتك  
هاجري وأهرب من عنيني  
واختفي في كل المداين  
ولو قالولك أني خاين  
صدقيم..  
صدقيم..  
واوعي لحظة تصدقيني  
رغم أني في يوم ما خونتك  
بس أوعي تصدقيني

## - آخر قصيدة في الديوان

آخر قصيدة في الديوان  
واللي كان نفسي أقوله  
قولته من أول قصيدة  
لما حيي أخذني ليكي  
وعدى لحدود الجنان

فاكرة لما قلت ليكي  
إنك انتي ملكتي قلبي  
ده حقيقي  
وانتي نور في حياتي نور  
لأجله بس مشيت طريقي  
اللي مشيته من زمان

كنتي منارة لسكتي  
كنت النجوم في سكتك  
كان ممكن أعمل أي حاجة  
عشان أبين ضحككتك  
وعشان تحسي بالأمان

أنتي مش رافضة هوايا  
ولا قلبي عليك هان  
حيي أنا في عنيك نور

حتي لو واقف ما بيننا  
ميت شيطان  
يمنع أن أنتي تقوليها  
بس قلبي حس بيها  
قبل ما يقوليها اللسان

ولا أقولك.. متقوليش  
عارفك أنتي متقدريش  
متخافيش  
حبنا محتاج شجاعة  
عشان يعيش  
وأنتي تحت حصار  
ونار ما بتنتهيش  
لو خلاص هتروحي؟  
روحي..  
واقفلي كل البيبان

والكلام اللي في قلبي  
قولته ليكي من زمان  
حاجة وأربعين قصيدة  
توصف الحب اللي كان  
حتي لو على طول بعيدة  
أو تسديلي البيبان  
واوعي تنسي حيي ليكي  
واوعي تنسي أني وحدي

مليت حياتك بالجنان

آخر قصيدة في الديوان  
بدمع عيني كتبتهالك  
وعايز أقولك.. خلي بالك  
أصل قلبك قلب طيب  
وناس كتير ما لهاش أمان  
واعذريني لو دموعي  
نازلة مني  
قلبي من حبك واجعني  
كان أيه هيجصل  
لو تحني بس يعني  
وتدي لهوانا الأمان

في النهاية

حاجة واحدة مقلتهاش  
أن قلبي مهما عدا عليه وعاش  
مش هينسى يوم عيونك  
مش هينسى ضحكتك  
مش هينسى لحظة حلوة  
عدى فيها في سكتك  
مش هينسى إنه يوم  
كان عاش سعيد في جنتك  
وعشان ده كله كتبتلك  
آخر.. قصيدة.. في الديوان

